

貴州名勝志

二

貴州名勝志卷之三

閩中曹學佺能始著

新鎮道所屬

都勻府 平越軍民府

鎮遠府 黎平府

都勻府 領州二縣一長官司

古西南夷裔地實名都雲五代史晉天福五年都雲酋長尹懷昌率其屬十二部附於馬氏即此元世祖至元十六年始置都雲定雲二府尋廢為二安撫司隸雲南國朝洪武十六年以都雲安撫

隸四川二十三年改都雲為都勻安撫司設衛以  
隸貴州都司弘治六年始置都勻府與都勻衛同  
城○勻城記云勻之為郡不獨部夷難馭蓋尤有  
隣患東連草塘西近泗城南接南丹北連平伐四  
面皆警孤城衆山環繞一水縈流而郡居其中焉  
國初都勻改衛之年有散毛散狗二蠻作亂涼國  
公藍玉遣鳳翔侯張龍討平之○城西有小孤山  
城東有東山城西北十里有豸牛山郭子章黔記  
云弘治七年都勻鳳凰山崩此三山實居其一○  
龍山在府城西二里主事張紳記畧云都勻郡城

隔河有山雄峙崔嵬雙峯插天躋其巔逶迤若數  
千里群山俯其下徘徊四望南盡交廣北極湘漢  
西連滇蜀皆在目前誅節卜築之日有靈龜大尺  
餘蹲伏其前者三日於是樓之閣之又殿而廊之  
自麓至巔鑿為磴道曲折盤迂可數千尺猶磴而  
迴樹以竹柏殿後石陂高廣平坦其文青赤二色  
相間有泉一泓泠泠然潔也左右皆古木藤蘿清  
風時至如萬壑濤撼一起一伏不可名狀又多猿  
鳥白鷗飛翔叫嘯往來其間若素相狎者然陸東  
記畧云出都勻西門渡邦水河濶百餘武為石砥

間支獨木與人慄慄行其上及岸西行過小團陂  
山有洞不甚廣而空靈可探又西曰觀音坐山  
旁道達姬家冲稍西北上煤炭坡郡人取煤供爨  
所也兩山洞門相望號駕齋洞山西則田坪麥苗  
芄芄然農夫耕其隙地即張子儀所墾田以資龍  
山院者又里許曰筭山以形肖凡再重即龍山麓  
南北長嶺如袍由筭山後峯彎轉而南行窪徑中  
至磴道皆耒石舍車而徒盤曲西上徑漸崎嶇僅  
容足又里餘渡橫澗有披烟洞洞可坐十餘人道  
旁漸見古樹桃梨野花雜錯若張錦綺又二里石

磴始寬二丈上為閣三重閣之後為殿左右翼廊  
登閣下矚群山環列不啻兒孫郡城樓堞市衢井  
舍歷歷在目巖巒古木虬屈蛟蟠蒼碧疊間雲烟  
蔥靄由閣之左緣徑西北行萬竹中僅如羊腸行  
里許有老桂巖桂在崑畔可數人抱高殆百尺婆  
娑可愛云按張翀字子儀馬平人 世廟時以比  
部郎抗疏論嚴分宜謫戍來勻勻人為構讀書堂  
即所謂鶴樓書院也先生之言曰歲戊午余遣戍  
是邦又明年戎事甫定殘軀若甦始於城市僻處  
相地一隙林木深邃築草亭半間携破卷殘編時

一展讀焉公以隆慶元年賜環至萬曆五年吉水  
鄒公元標以論張江陵不終喪謫戍至郡儼居圮  
舍尋結節張公讀書堂之右後先若一轍居勻六  
年始召還居為諫垣勻之山川得二先生增貴其  
庶幾乎

都勻長官司在野南

元為上都雲等處軍民長官司 本朝洪武十六  
年改置易今名初以土人吳賴為副長官景泰三  
年其孫正有功陞正長官世襲○司東十里有洞  
亦曰都勻前門北向高廣僅丈五尺後門南向高

廣四五尺洞生亂石如象鼻之狀而雜草蒙茸治  
南有水亦呼都勻水

邦水長官司

在十府里西

正長官吳姓世襲

元為中都雲板水等處軍民長官司地洪武十六  
年置今司邦水之於板水猶都勻之於都雲也○  
司西之山曰箐口林木翳然陟之可望龍山

平浪長官司

在十府里西

正長官王姓世襲

本元都雲安撫司之地亦國初分置○司東南十  
里有麥冲河河岸有古寨○司東三十里有九龍  
洞洞內石龍張露鱗鬣蜿蜒如生○司西南六十



里為凱陽山勢甚險峻有寨其上按即凱口圍也  
圍十餘里高四十丈四壁斗絕獨一徑尺許盤旋  
而登上有天池雖旱不竭○嘉靖丁酉都勻部苗  
阿向與土官王仲武爭田構殺仲武出奔阿苗遂  
據此圍為亂督撫軍門檄宣慰安萬銓討之邀重  
賞始行提兵萬餘屯圍下相持者三閱月仰視絕  
壁無可為計獨東北隅有巨樹斜科偃蹇半壁間  
然去地二十丈許安令軍中曰能上絕壁者與千  
金有兩壯士應命乃鍛鐵鉤傅手足為指爪人持  
四徽一劍約至樹憩足即垂徽下引各人而上有

頃聞刺刺聲若崩石則一人墜地齧粉矣俄而四  
長徽下垂始知一人已據樹乃遣四兵緣徽而上  
蹲伏樹間壯士復自樹爬緣而上至圍頂適遇巡  
檄者鳴鑼至乃伏草間俟其近揮劍斬之鳴鑼代  
為巡徽而賊恬然不覺也乃垂徽引樹間四人四  
人復引下人累累而起至圍者僅二三十人便舉  
火發砲大呼曰天兵上圍矣賊眾驚起昏黑中自  
相格殺死者數千奪徑奔下失足墜崖死者又千  
人黎明水西軍蟻附上圍撫臣令軍中曰賊以鬪  
格而擅殺及黎明後殺者功不錄自是一軍解體

相與賣路走賊阿向始與其黨二百人走圍營一  
空焚其積糧乃班師而以官兵三百戍圍月餘阿  
向復糾爛土黑苗襲圍盡殺官軍撫臣又檄叅將  
李宗祐討之為賊撓去以千金贖回復詔安萬銓  
勦之萬銓乃招阿向待以不死責王仲武均其田  
而亂始平云

平洲六洞長官司

在府西南正長官楊姓

亦元都雲安撫司地與平浪司同時置○平洲河  
在司治南水中有沙洲土人開肆貿易其上○六  
洞山在司西南七十里山極奇峻上有六洞寨○

鄒元標曰余童子時有傳鶴樓先生集至文江者  
從旁窺之至龍山道院記恍遊員嶠方壺恨不旦  
暮往彼未問曲折心津津在平洲六洞中矣

麻哈州

在府城北六十里

土同知宋姓世襲

元為老犵狁寨後改麻峽縣國初為麻哈長官

司隸平越衛尋陞為州改今屬領長官司二曰樂  
平曰平定○州西十里銅鼓山有樹狀如圓鼓因  
名山麓有水晝夜三溢不愆其候又州東十里有  
波隴山州南有麻哈江○滇程記云麻哈江津人  
乃木獠夷以石壘就水澤爰獠家夷女習鰕蝦以

供膳祭

樂平長官司

在州西四十里

副長官亦宋姓

元狃狃寨地洪武中置今司隸平越衛及麻哈改州移屬焉○司南為樂平溪東北五十六里為馬場山以與牧馬場相連故名

平定長官司

在州北一百里

長官吳姓世襲

本朝洪武二十二年置初屬平越衛三十年改屬

清平衛及州麻哈又改屬之○楊古山在司北二

十里平定山在司南三十里○司東八十里為舟

溪江五十里為山江河有山江渡去清平城四十

里

獨山州

在府南五十里

領縣一長官司二

元置獨山州軍民長官司屬新添葛蠻安撫司

本朝洪武十六年改為九名九姓獨山州長官司

弘治八年與麻哈同時改為州○鄒元標疏云衙

舍荒蕪淒涼滿目莫甚于麻哈獨山二州又云如

獨山知州吳譽聞文學吏事亦自名家入官以來

夜篝燈同妻子守孤印而含冤被論去他可知矣

○獨山在州南二十里尖圓陟險無他山聯屬故

名○治南又有鎮夷山山高而頂平有土酋結寨

以鎮苗人故名

清平縣

在州城北一百三十里

歷代夷酋據之元為麻峽縣地本朝洪武十四年開置清平堡尋改為衛遷治於堡北領有清平長官司弘治八年改司為今縣以司治為治○縣東二里曰東山絕頂盤石平坦可坐數十人縣南三里有三石如人對奕名石仙山○縣北七里天然洞一名小空門逕呀然弘邃虛明可肆几筵其左有太極洞又十五里有雲谿洞三洞皆軒敞可以游息雲谿洞有一溪水從洞流出以資溉田又

相近有賓陽洞。吳國倫詩：奇峯倒作萬蓮開，洞裏陰晴只浪猜。罔象不驚龍正卧，寒湫夜夜噴風雷。此天然洞作也。雲谿谿上碧雲流，有客乘雲當入舟。石穴空明無一象，璇池瑤草飯青牛。此雲谿洞作也。學使者蔣信詩：青山臨路石門開，天地神工亦異哉。不有仙人能指點，何由竹杖得迂迴。乃賓陽洞作也。○香爐山在城東三十里，盤旋三重壁，立萬仞，形如香爐。景泰初，苗蠻帶同烈據之，以叛都御史王來討平之。□田汝成云：香爐山連亘三四層，攀緣鳥道而上，上上容百萬人，窮峻極險，有漢



流一溪沃疇千畝聚落蜂屯保以為奸正德十二年復叛湖貴合兵討之環列山下弗克攻尋有隕自厓者獲而訊之則江估之被虜也因知苗俗以長至為歲朝至其夜會大雷雨苗皆醉夜半土兵架木梯懸絕壁因尾江估援厓上兩哨路數人遇斫者更鼓者俱殺而代之衆軍率登乃焚柵燔巢悉殲之遂城香爐為官戍居其降者於黃猴落燈之間焉○滇程記曰興隆衛達清平衛七亭而遙曰黃猴周洞重安羅冲落燈○郡人孫應鰲清平十二謠今存其二云秋日荒城隱暮笳太山猛虎

永州蛇稜稜黃葉漫空舞繞郭茆茨只幾家又教  
場草長蟋蟀鳴數十操軍不滿營但願承平似今  
日國初屯戍九千名

合江洲陳蒙爛土長官司在百洲副長官張

姓世襲

元為都雲安撫地後置合江洲及陳蒙章氏長官  
司洪武十六年改今名○司東南三十里有梅花  
洞宣德九年都指揮顧勇等攻破之○元置都雲  
定雲二府而定雲府領有合江及陳蒙二州即合  
爛土三種共名為一司我朝弘治四年爛土酋

也富架重惡龍等為亂其明年總兵鎮侯顧溥帥師討之七年春始平嘉靖十六年復從阿向襲殺凱口圍官軍其名不佳者其種自惡

豐寧長官司

在二州十南里

長官楊姓

亦元都雲安撫地沿革同前○司西南八十里有行郎山山麓斗絕山頂平坦有蠻民二百餘家居之造梯以登半崖下流泉湧出四時不竭

平越軍民府

領衛

二州

一縣

三安撫司

一

漢唐為蠻夷所據宋嘉泰初土官宋永高克服麥新地內附號黎峨里等寨元置平越長官司隸八

番順元宣慰司洪武十四年置平越衛屬四川萬  
曆二十八年播州平以黃平安撫司改黃平州草  
塘甕水二安撫司白泥餘慶重安容山四長官司  
改餘慶湄潭甕安三縣而建平越軍民府于衛城  
以統之并割清平衛凱里安撫司平越衛楊義長  
官司俱屬焉○犀牛洞在府城南隅張三丰高真  
觀下洞有石屏正德間觀內鐘夜半與牛鬪如雷  
吼侵晨水草猶有存者三丰名猷或曰羊城人或  
曰閩人少遇異人棲靜三十年出山混俗補刑曹  
吏以囚劫獄編戍平越解將入境三丰浴于河沈

黃州志 卷之三  
溺不起明日自水出袖各司回文解者探囊中而  
原文已無矣始神之別去及居平越千戶張信待  
之甚厚久之謂信曰吾為汝父治葬地以報君殷  
勤命信負其父骨指一巖窟曰汝往擲置之口中  
既入見石牛欲相啖懼而掛之角出以告三丰丰  
曰封侯亦足復授鐵椎命往擊洞門石磴且曰擊  
不過一二椎至斷而已信不勝擊至七方斷見金  
魚飛去歸而告之三丰丰曰惜哉汝八口只存汝  
一人十年後信之家口垂亡盡獨留信一人在焉  
後永樂靖難信以功封隆平侯至十二年奉勅祭

武當山見三丰于山中石巖炊瓦釜傾米汁為茶  
送棗一枚信置湯不飲袖其棗而別下山視棗已  
長尺餘今觀有三丰禮斗亭浴仙池○栽黎山在  
府城東絕頂有泉又有穿巖巖孔穿透廣容千人  
○月山寺在府城西又二里有燕子洞羣燕棲集  
于中又十里有百人洞一名穿洞清泉湧出廣可  
容百人○城東南五里有七盤坡道經其上王守  
仁七盤坡詩鳥道縈紆下七盤古藤蒼木峽聲寒  
境多奇絕非吾土時可淹留是謫官猶記邊烽傳  
羽檄近聞苗俗化衣冠投簪實有居夷志垂白難

尋菽水歡○城南四里馬場江與羊腸河通其水湍而深中流如沸武勝關設于此左右懸崖一水中貫實諸路之衝也又有羊腸關在城東南二十里○月山寺在府城西○滇程記云清平衛遠平越號六亭曰雞場胡資楊老羊場三郎實九亭而遙陟梅嶺關渡麻哈江地有羊雞之場諸夷互市處以十二辰相遞歷十二日一市每場歲三十市歲暮即場醪會持牛角為觴吹蘆笙為樂男女踏歌盤錯互侑以歡至元夕乃撒

清平衛

東至興隆衛西至平越府各六十里與清平縣城同

### 興隆衛

漢唐皆為牂牁蠻地宋號狼洞隸黃平府國朝  
洪武二十二年傅友德南征以地當西南要害始  
置衛隸貴州衛城北龍巖山下淵有龍居之時出  
雲雨故名衛曰興龍後改龍為隆○飛雲巖在衛  
東三十里巖西為月潭寺中為公館王陽明有記  
其畧云興隆有巖曰月潭壁立千仞簷垂數百尺  
其上瀕洞玲瓏浮者若雲霞亘者若虹霓豁若樓  
殿門闕懸若鐘鼓編磬幢繖絡譎奇變幻不可



具狀而其下澄潭邃谷不測之洞環密回伏吳維  
嶽飛雲巖記畧云興隆東行三十里有月潭寺寺  
左為巖距地百餘尺中虛而下嵌乳液融結紛詭  
殊狀豎者柱矗懸者絡綴揚者鳥厲突者獸蹲躡  
級漫瞻斂衽徐睇極意所愜邃洞豁訝而窅際清  
渠激注而前繞○龍洞山在衛城北里許又名狼  
洞石勢蘄巖水色深碧相傳有龍居其中每雷雨  
則飛出謝肇淛興隆衛詩乾田一夜羽書馳客子  
心驚馬步遲今日材官新獻馘雲巖草木盡旌旗

宋為黃平府隸敘州元隸播州洪武八年改府為  
安撫司以地皆夷獠多叛增置黃平所守禦隸四  
川都司十五年改隸貴州都司萬曆二十八年播  
州平改為州與所同城屬平越府○州城東有梅  
子洞以多產梅樹因名又五里為七里谷俗名七  
里冲兩山壁立中通一路楊酋叛時屯兵二十七  
營於此以窺黃平蓋以此谷為貴竹咽喉也○馬  
鬃嶺在州東四十里嶺之陽有馬蹄井大不盈尺  
深入石竅丈餘相傳唐末一將軍追苗賊至此軍  
渴馬足忽蹈清泉湧出苗退馬因墜鬃于此其鬃

豎立虛空若在馬首而不就地拔之不可得掘之亦不可得其後欲求見者具紙錢拜祝始露其形

○斗崖山在衛西五里有洞高五丈濶減其半崖之中無路可通左有虛崖長二丈似徑以行常有涓涓之泉下滲每旱時崖輒狂風透出飛沙揚石洞後山頂有穴一道人遨遊其上忽墜入穴中時黑時光二里出洞口見洞兩邊疊疊金鱗似龍道人出與老樵語其事引往視之而道人莫知所往崖間隱隱有字剝落不堪讀○燕子洞在衛城西十五里紫燕千百為羣潛藏於此冬不可鄉洞口

二丈其土疏而黏黑而肥土人用之糞田入洞二里持炬至大洞內源泉混混聲如鳴金有時如擊楫時有黑衣人乘霧出入○都凹山在衛西北三十里有琴板寺在萬山巔曩一老人露居野宿數日始陟其處寺右小石池池側一小井上有索不知遺自何年老人擲之於井綆直不可汲入寺若有火烟氣而不見人少頃陰風怒號難以復留老人歸語所知有詣遊者但遙見一茅茨在雲中耳○徑亨洞在州北二十里洞內房室巍峩器用鮮潔人有欲借釜甑壺者拜祝須臾挈出借之但可

睨視而已其後借者送還多置山麓神怒毀器而  
錮其門因名封鬼洞間有聞杵聲或時見米糠浮  
水而出○冷水河在州城東源自朗城舊土司水  
白而寒三伏不可涉

### 餘慶縣

府東百五十里有餘慶白泥二長官司元末俱為  
州洪武十七年仍改為長官司俱屬播州萬曆二  
十八年播平合二司改為縣屬平越府○白泥江  
在縣東二里源出黃平葛浪洞經縣界流思南河  
縣西三十里有小烏江源出椒溪經縣南流入涪

江又三十里有大烏江河源出水西經縣界流入  
思南河

### 甕安縣

宋有草塘甕水為黃平府地洪武八年於重安置  
長官司草塘甕水置二安撫司俱屬播州及討平  
楊應龍合三司為甕安縣屬平越府○旗山在縣  
南五里峯頂橫開一洞名川巖如天中之月縣北  
三十里草塘舊治後有後崑沿巖而上曲折處石  
列兩傍如雉堞狀又城北三里鼠場有龍洞極幽  
邃水深數仞中一石橫架如橋寬夷可涉其水澄

清時有神魚不可以餌釣

湄潭縣

萬曆二十八年討平楊應龍因以播州苦竹壩三里七牌地置湄潭縣屬平越府湄潭之水源自播州流繞縣前宛曲如眉故以名潭而縣名亦以因之

凱里安撫司

元時四川播州有凱里安撫司其安撫曰楊端洪武間端之孫友授宣撫與弟爭殺正統間割置改屬貴州清平衛萬曆二十八年討平播州改屬平

越府

鎮遠府 領縣二 土司二

古有豎眼大田溪洞唐武德元年以其地當牂牁之衝置婺州貞觀八年改思州天寶中改寧夷部後陷於蕃宋紹興初復置思州以田氏為守德祐元年田氏降置鎮遠沿邊谿洞招討使司尋改軍民總管府以田氏為總管治鎮遠中河山洪武五年改總管府為鎮遠州隸湖廣永樂十一年廢思州思南二宣慰司以故地為鎮遠等府屬貴州正統三年省州存府府與鎮遠衛同城



貴州各縣志 卷之三  
鎮遠縣 附郭

古思州地有鎮遠金容金達蠻夷長官司宋大觀  
元年田氏內附始置安夷縣尋廢元初改鎮安縣  
我明正統三年復為長官司弘治十一年長官何  
倫以罪革改司為縣設流官附郭○郡有生熟二  
苗熟者頗輸丁錢生苗習於剽掠俗皆椎髻赤脚  
飲食用蕨灰為鹽其女子及笄入山與男子唱歌  
相和當意者不告父母而至男家俟有胎孕方拜  
翁姑稱婦每生子皆奉一牛於女之父母無子者  
則以婢畜之別覓他女如前○石屏山在府治後

石高百丈端直蒼潤如屏風山半有石竇久雨竇  
中水出其明如虹則江必溢故居民避水以此為  
候山右有路上通旋繞屈曲名九曲岡○縣後有  
大石崖山苗自金浦狗洞來由此○又有小石崖  
山苗自施秉鼓樓坡來由此則在鎮遠衛後○味  
泉在府治西一名味井其水極甘○中河山在府  
治東半里兩水夾流山處其中南麓為玄妙觀北  
崖產白石光潤可琢硯及圖書土人謂昔豎眼鬼  
所居莫敢動兩崖巨石獨立水中上豐下儉呼香  
爐崖府城玄妙觀後有太和洞廣一丈二尺袤一

丈八尺旁有支洞深黑不可入○鐵山在府城東北三里石皆鐵色其下為鐵溪南行入鎮陽江其水清淺可愛產羸蟹及小魚味極佳溪之第一灣有巨石下瞰如屋廣五丈袤一丈七尺高一丈二尺其前溪水清冷可茗第二灣有長潭其北即絕頂也郡守祁順遊鐵溪二記畧云余以公暇約寮二守為伴步出江澚登小舟順流而東兩山夾峙水自中出是為鐵溪舍舟循溪而入見水東有石巨麗即下瞰如屋者可二里東望烟靄中三峯鼎立如畫山初入四望如堵忽又通豁其崖石往往

傾仆如墮其下洞穴深汲可坐可卧山之趾衆水  
交流匯而為淵激而為瀨羣儵往來歷歷可數遊  
鐵溪之五日二守復請漁于長潭乃乘小舟順流  
至潭岸北羣峯疊出飛石架空狀如蟬螭俗呼仙  
人橋其前有峯直挺上出飛鳥盤旋出其下南岸  
石委積成洞中有蹊隧可通往來江之中羣石錯  
出急湍奔瀉名浮石灘其東有石側立上多樹木  
庇覆名古牛崖長潭之水清碧如澱舟入如憑虛  
御空忘其為泛涉也○大洞在府城東五里分水  
嶺北洞門一隙而入其中寬廣如七間屋故俗名

洞為七間屋中書丁璣詩四首野日春正暝山陰  
午猶濕布穀不停聲人人荷鋤立又蘭橈泛江水  
江水綠於苔日日斜陽裏行人自往來又空崖蒼  
翠間平窪自相逗有時石上眠雲來觸衣袖又潭  
淨山同色雲寒鳥不飛微茫烟樹際獨見釣船歸  
○觀音窟在府城東十里有石山高數十丈屹立  
江上其趾擘開為洞廣一丈袤三丈高如之涵演  
清漪可比船而進洞半有竅如牕上有石如佛像  
洞頂色碧有紋隱起如龍蛇又五里有馬場坡兩  
傍皆深谷中有一路苗白白虫者必由於此○吉

祥山在城西半里臨江狀如燕窠上有吉祥寺寺  
前水深磯石峻嶒漁人集焉程焮詩西域鷺峯寺  
南溪燕子窠桃花肥細鱖綿竹插迴渦斷續風前  
笛披離雨後簑數聲江上曲明月正斜過○平冒  
在府城西三里諸山自白羊坡頓伏而來至此方  
止雙峯圓聳插天江水環其前四山迴合中有平  
原可居又一里有獅子山自東南望之如獅自北  
望之如展旗又六里有白石柱臨江駢立一夫一  
小高數十丈府湧溪西至偏橋有西峽諸山為崖  
者如樓臺鼓角為嶽者如銀牆鐵壁有飛瀑數處

掛崖石高百餘丈稀者若輕綃薄霧厚者噴沫如  
撒珠春夏盛時飛過南岸船經其下仰視如白虹  
○鎮陽江即澗水一名鎮南江又名澗溪蓋五溪  
之一也在府治前受黃平興隆諸水過府城東流  
三百里入沅水○鐵溪在府城西產異蟹水利可  
涿鐵因名又四里為牙溪又名雪溪溪中有鬼物  
舟過此者寂不敢譁每清明三日居人皆閉門禁  
烟行旅不敢出其途犯者立致災禍余同年友鄭  
憲為鎮遠縣令目覩其事

施秉縣

在府西南  
六十里

元至元二年建前江等處軍民長官司洪武五年  
改施秉蠻夷長官司後因土官田琛構兵司廢正  
統九年改為縣設流官○岑麓在縣城北四面陡  
立岡隴重複初縣治在從化鎮正統十四年苗叛  
縣燬景泰間招撫復業依此以居

府屬土司

邛水一十五洞蠻夷長官司在府東八十里宋置  
邛水縣元改安寧縣尋復舊名洪武五年改置團  
羅得民曉隘陂帶邛水五長官司二十五年併四  
司入邛水副長官袁誠本世襲



備橋長官司在府西六十里元至元二十年建本  
司洪武五年以原任鎮遠府土同知安德調為正  
長官司其左副長官楊錢灘男文鳳保右副長官  
楊通賽俱仍舊任世襲

黎平府 領縣一長官司十三

牂柯夜郎之旁地自古不入版圖五代時思州田  
氏據其溪洞宋乾德中各授土人為蠻夷官隸湖  
北路元置潭溪等處軍民長官司隸思州宣慰司  
洪武中置蠻夷長官司增設五開衛永樂十年改  
置黎平新化二府隸貴州宣德末以新化省入黎

平而衛隸湖廣○銅鼓崑在府城東北二十里石  
洞高大如屋深遠可三里許漸深處一竅通明再  
入小溪橫流來去深不可測有石平鋪可十餘丈  
其紋片片如雲如剛又如龍甲俗呼萬頃田○飛  
山在靖苗戍舊有飛山廟祀其酋長楊再思甚著  
靈蹟洪武十九年移在府治東隅石晉天福中再  
思據十洞偽稱徽誠二州刺史附於馬殷至宋太  
平興國中誠州酋長楊通蘊始歸附通蘊尋卒其  
弟通寶入欵

永從縣

在府城南  
六十里

唐有谿峒福祿州宋改福祿永從軍民長官司洪  
武初改蠻夷長官司弘治六年改今縣○福祿江  
在縣南源自苗地至府西境為古州江東流至此  
合彩江是為福祿江○羅團洞在縣東北十五里  
洞門寬廣旁有石磴如床可容二百餘人○治東  
四十里太平山倍之為摩天嶺又二十里為龍見  
山○治東南九十里有巴龍山西北一百二十里  
為寶唐山

府屬土司

潭溪蠻夷長官司在府西南三十里宋置潭溪長

官司洪武初加蠻夷長官司後以石平禾征古州  
有功授其子文漢為正長官世襲○司南一水清  
澄可鑑者潭溪也巨石跨其上廣二丈餘長十倍  
之名天生橋西南有銅關鐵寨山山勢高峻其上  
平廣可容千人三面據險惟南向可登○磨盤山  
在司西北以山頂有石形似而名天旱鞭之雨旋  
八舟蠻夷長官司在府北二十里宋元皆軍民長  
官司洪武初改變夷長官司正長官吳金骨舊職  
世襲○司南有八舟山上有石如人曰仙人巖其  
西南為八舟江來自黎平府城東北流入新化江

黃州志 卷之三  
西北合清水江

洪州泊里蠻夷長官司在府東一百五十里正長官李德輿河南永寧縣人洪武五年從江陰侯征古州叛蠻授今職世襲○司前小山下有龍洞深廣各里許中有龍潭西有蓮池匯為潭洞江○司北洪州江源出本府之龍見山而合渠陽江○泗洞山在州境山下出泉神司之也名泗洞泉曹滴洞長官司在府南三十里本宋容江巴黃長官司地元置曹滴洞軍民長官司洪武初以容江巴黃司併入改曰蠻夷正長官楊都萬乃楊再恩

裔孫也五代兵戈攘擾再思據有徽誠稱刺史當  
宋盛時其子孫相繼入款故楊氏獨盛而都萬授  
今職○容江在司西南源出苗地北流入福

江祿

古州長官司在府西六十里宋咸平初古州刺史

向通辰入貢其後向氏世世入款元置古州八萬

洞軍民長官司洪武五年改今名以楊秀茂為正

長官二十五年古州蠻叛都督俞通淵討平三十

年復叛詔楚王湘王合征之於是清平黔陽古州

諸蠻悉平而楊氏世襲如故

西山陽洞長官司在府東南一百里古為生苗之

地永樂五年始置司以韋方魁為長官其地多峒人獷悍喜殺地沃而惰於耕作惟務剝畧尋常持刀鋌挾弩矢潛伏陂塘踉蹌篁薄中飄忽殺越不可踪跡自正統中峒人叛方魁遂納印於府其後稍平復嘉靖八年方魁裔孫文郁求襲世職不許而吏部除吏目往治峒亦不納乃以韋昌金為長官○司北有大崑山其西為高風嶺東為天目山○大崑江受福祿江之水流入廣西柳州界湖耳蠻夷長官司在府北一百三十里元舊司洪武五年以楊再祿為正長官永樂十二年以歐景

南為副長官司皆世襲○石流泉在司東三十里飛泉迸出亂石如流故名又十里為九牛山

亮寨長官司在府北一百里司治西有諸葛武侯古寨因以為名洪武五年以龍政忠為長官世襲歐陽長官司在府北九十里元時江西泰和人楊都統以功授長官世襲至今

新化長官司在府西北六十里永樂中立新化府後併入黎平此其地也洪武初以歐明萬為正長官世襲○司南十五里有六疊山週迴六疊始陟其巔故名○司東南有徐侯墓相傳宋辰州太守



失其名因入峒招撫蠻人被害棄尸河內日則順  
流夜則逆泝洞蠻神之因改葬焉

中林驗洞蠻夷長官司在府西北一百里其正長  
官楊盛賢洪武五年從江陰侯平苗以功授

職今

赤溪洞蠻夷長官司在府東北二百里其正長官  
楊通諒永樂六年以勦羅臺賊功授今職副長官  
吳世銘襲元舊職

龍里溪蠻夷長官司在府西北九十里其正官楊  
光福洪武初以功授今職○廣輿記云司境有龍  
標寨乃唐敘州潭陽郡龍標縣地王昌齡以江寧

丞左遷龍標尉李白贈之詩云楊花落盡子規啼  
聞道龍標過五溪我寄愁心與明月隨風直到夜  
郎西

貴州名勝志卷之三終



貴州名勝志卷之四

閩中曹學佺能始著

思石道所屬

思州府

思南府

石阡府

銅仁府

思州府

領長官司四

春秋屬楚秦屬黔中郡漢屬武陵郡酉陽縣三國  
吳分置黔陽縣地隸焉隋為清江郡唐為思州寧  
夷郡丹川丹陽二縣地先是有田克昌者不知何  
許人以商賈僑居於此數傳至安定思議二人能

以恩信結服夷民為大首領是時為唐永隆年所著鐘銘猶存至宋其地屬思州安夷縣田祐恭以累討叛寇有功紹興間官至奉寧軍承宣使卒年八十贈開府儀同三司少師思國公元至元十二年田氏降置沿江安撫司隸思州宣撫司尋自龍泉坪徙宣撫司治於清江稱思州而改稱故思州為思南隸湖廣是時田仁厚為思州宣撫使兼湖廣左省洪武初仁厚獻鎮遠思州二府發川等十縣及三十四州於是分置思州思南二宣慰司以仁厚為思南宣慰使子弘正率部屬從征羣蠻授

思州宣慰使其族屬有田仁智者亦授宣慰使居  
思南為二田又族人有田茂安者初據沿河婺川  
以獻偽夏明玉珍夏亡茂安乃降立為思南宣慰  
使其後仁智子田琛與茂安之子宗鼎爭地構亂  
遂滅之以為府○栽山在府治南其山率犄而蒐  
栽也下為架溪跨以木橋○異溪在府城東八里  
以小水各分派入于平溪大河也又三十里為嘉  
前山○江頭山在府城西八十里有歇路坪土人  
以節序相聚笙歌于此又二十里為天應山相傳  
昔禱雨者呼天而應故名

都坪峩異溪蠻夷長官司附郭元為臺蓬若洞住  
溪等處蠻夷長官司隸思州洪武六年改置今司  
以原任宣慰司頭目何夢霖為正長官永樂元年  
原任宣慰司頭目周斌從征亦授正長官皆世襲  
黃道溪長官司在府東北一百三十里唐為丹陽  
縣元為黃道溪等處軍民長官司元有宣撫司同  
知劉貴者洪武初勸田氏稱臣入貢歷授平岳司  
長官二十五年調本司正長官又有宣慰司頭目  
黃文聰以功授本司副長官俱世襲○司治西七  
十里有泉洞崖壁千仞瀑泉飛瀉下成溪河以艇

從傍入洞廣容百人○龍泉在司治北其水清潔而甘居民賴以溉田但不可滌垢垢則泉闕不出又有豎眼洞有物如人一目豎生每靜夜常出於河漁者值之亦不傷害間竊人網而復還之併以魚置網中為酬○司北五里有淘沙溪淘洗沙石可以煎水銀

施溪長官司在府治北二百二十里唐為丹川縣元置今司洪武元年以元土官劉道忠有功授正長官世襲

都素蠻夷長官司在府治西九十里舊為田宣慰



親管之地永樂十一年設本司

思南府 領縣二長官司四

元至正二十二年偽夏明玉珍置思南道元帥府  
始有思南之名洪武五年分置思州思南二宣慰  
司而思州始析為二永樂十一年二宣慰使以構  
兵罷其世官二司始改為府而設流官詳在思州  
志中○崖門山在府城西兩山對峙巖壁險峻官  
道出其中左曰大巖門右曰小巖門永勝武勝二  
關依巖而立郡之門戶也去崖門數里有迎春藏  
春二洞不甚深廣而壁立奇峭石色黝潤有鐘鼓

洞二寬廣相亞入者必以炬上有二石乳懸空擊  
之作鐘鼓聲○古牂柯郡城在府治西相傳即漢  
末時所保有巴江水在城西南遶龍門山而接牂  
柯界○萬勝山在府城南四面斗絕元末紅巾之  
亂郡人避兵于此○白鷺洲在城東北烟水蕭疎  
與雲樹相掩映頗似中土○馬援祠在故思州治  
相傳宋時田祐恭之母夢馬援入其宅乃生祐恭  
而援祠不復靈應及祐恭卒有見其跨馬入援祠  
者自是神靈復如初焉

安化縣附郭詳見府下

貴州通志  
卷之四  
婺川縣

在府北二  
百四十里

隋置屬庸州後屬巴東又隸思州永樂十一年改  
今屬其俗得獸祭鬼擊鼓迎客採砂為業用泥封  
門○廣輿記大嵒華蓋二山俱在縣境洞壑深邃  
可資游覽亦云昔人避兵之所

印江縣

在府東  
三十里

唐置思邛縣以縣十里有思邛江為名後乃訛邛  
為印至元時遂改思邛江長官司至弘治八年長  
官張鶴齡以罪廢因改為縣

屬司

水德江長官司附郭隋為賓化縣五代歷宋省入  
婺川縣元置水特江長官司以張坤元征苗有功  
授本司正長官洪武二十三年曾孫乾福襲改水  
特為水德永樂十八年以楊潮海為副長官皆世  
襲

蠻夷長官司附郭元思州宣撫司地洪武十年始  
置司其長官安氏本京兆人祖曰仲用同田少師  
督兵開設思州任義楊元帥六世孫世興授沿邊  
溪洞軍民總管八世孫輝洪武初歸附授今職其  
副長官李斌國初歸附授隨司辦事長官永樂五

年授今職皆世襲

沿河祐溪長官司在府治北一百一十里唐武德四年招慰生獠置城樂縣五代以後省入婺川元置今司以張文龍為正長官冉永安為副長官皆世襲

朗溪蠻夷長官司在府城東四十五里唐置朗溪縣宋併入婺川元置朗溪洞洪武十年置本司其正長官田氏元時有毅保任進義校尉大萬山長官洪武五年歸附三世孫榮以功授今職副長官任氏元時有文貴者任石洞長官永樂四年三世

孫鑑以功授今職皆世襲僉事羅昕朗漢司詩百家村落一荒司列嶂迴峯碧四垂風俗漸看同郡國印文猶自刻蠻夷重樓鐘鼓初晴夜夾道旌旗薄暮時自是年來親翰墨壁間隨處有題詩

石阡府 領縣一長官司三

秦黔中郡漢夜郎縣牂柯郡地唐初為思黔二州境武德四年置夷州義泉郡即今治也貞觀十一年徙郡治於綏陽五代復為蠻夷宋太平興國間夷州蠻入貢置綏陽夜郎二縣元置石阡等處軍民長官司隸思州宣撫洪武初改隸思南永樂十

一年改為石阡府○龍山在府城東南隅山下有  
風鬼洞知府余志辯畧云府後高崖曰龍山轟聳  
雲表左崖畔一古洞門敞若戶進三四丈一洞門  
漸小僅足容身昔有人入見其中銅鼓金盃銀物  
之類甚夥石隙中有水瀉下深潭莫測疑有蛟龍  
潛之風氣逼人毛髮盡豎春水漲漫流至五巴寨  
桶口出入于大溪冬日則涸歲旱求水即得雨大  
風颭發人不能行疑為鬼物所憑名風鬼洞以余  
言之洞中幽深陰淫之氣勝水亦陰氣水能生風  
所以風之發有巨細無形影謂之龍潛或者有之

謂之鬼未之信也又二洞辯畧云府治西面兩山  
高下相并曰崖門崖下水流合平茫水入大溪崖  
門西上有洞懸空朝北高峻莫能窺其深廣春夏  
間人過者仰視其中有鑼鼓聲秋冬則無聲又張  
家寨高山上有一洞高險人莫能到春夏間亦有  
鑼鼓聲秋冬寂然人俱目以為風鬼噫洞者山之  
竅其中空虛以通氣陰淫最勝發為地風又值洞  
口樹木為天風吹噓動激其聲貫入洞中與地風  
相應遠聞似乎鑼鼓秋冬萬物零落無物觸動雖  
有風而聲不作所以寂然無聞也○龍洞在府西



南余記畧云洞在龍底江上其山高峻下有洞濶  
三丈許深約三里燃炬以進數十步有圓洞門約  
三尺又五十餘步有天生橋約丈餘橋內有石田  
過橋兩石如盤形類葵花上有水滴盆中其深莫  
測洞內惟聽水聲潺潺而已相傳神龍所潛故名  
龍洞洞產奇石大小類鴨卵上有花紋深碧色俗  
名醜果任人賞翫不得懷歸

龍泉縣

在府西一百一十里

隋有義泉縣唐貞觀十一年改智州為牢州從治  
於此元置大保龍泉長官司永樂十七年以安永

和為正長官傳至安民志萬曆二十八年播酋楊  
應龍突犯龍泉民志戰死及播平改司為縣錄民  
志一子世襲土縣丞其祖職長官與副長官朱承  
勳俱世襲土主簿○騰雲洞在縣城北十里平地  
突起一峯四面險阻中通一孔僅可容人入數十  
步洞中高濶各五七丈左右有罅通明者五又十  
里有黃魚泉水泛則黃魚羣出大者百餘斤年豐  
魚出益廣○鳳凰山在縣東山下有魚子孔口圓  
如盤日出則光漾於中其深無際水泛輒有青紅  
間黃之色前有石磯鱒魚滿尺常躍磯上迴旋泉

窟人不可捕

府屬土司

石阡長官司附郭唐為寧夷縣宋省入綏陽縣元置石阡等處軍民長官司洪武五年楊正德以其地歸附改石阡長官司正德本太原人其先令公之後曰文廣者從狄青南征儂智高克服南土得世官如石阡烏羅萬山邛水提省平梅皆宗之孫智通征丹章有功進思南都元帥府僉事偽夏聞其名授以思州都總管不受智通子即正德也授承務郎副長官世襲其正長官安景文以永樂十

四年任景文本京兆人祖宗誠以隋大業二年平  
黠夷授義陽元帥在今龍泉司至宋有安文者與  
弟安武從田祐恭東平保靖西克馬湖涪夷擒龍  
州叛賊任政隆加榮祿大夫石阡龍泉葛彭偏橋  
思南土官皆其後裔至景文洪武三十二年隨宣  
慰司辦事長官永樂十一年宣慰司革隨府辦事  
十四年授今職○金雞山在司東高百丈翠微之  
色如沐有黃楊山產黃楊木故名○秋滿洞在治  
南余志記畧云府南梭寨隔岸之山高峻凌空下  
有秋滿洞洞門開敞中有一眼通明洞後穿過塘

池寨平茫溪石泉長流灌田正統間苗賊為亂民  
多竄入洞內賊不敢入但守洞口計必困死於內  
而入穿後洞出塘池平茫遂皆得免  
苗民長官司在府西南八十里唐為洋川縣有水  
名洋川今洋溪是也宋為樂源縣洪武十年置今  
司於故縣治之北壁林三十二年以原任龍里司  
副長官汪得英為苗民正長官世襲  
葛彰葛商長官司在府南一百里唐為都上縣貞  
觀四年以縣置夷州義泉郡宋廢元置今司洪武  
五年以安永歸附授正長官世襲○夜郎縣古蹟

在司治西六十里按西漢書楚將莊豪從沅水伐  
夜郎至且蘭楸船於岸後以且蘭楸船牂柯處乃  
改其名為牂柯異物志云牂柯者繫船杙也吉水  
羅倫謂烏撒七星關水即牂柯江源析流為盤江  
去此甚遠蓋夜郎從高戎直通甌駱此亦所轄之  
地但非其治所耳西漢書云夜郎最大又夜郎侯  
問唐蒙曰漢孰與我廣大莊豪從沅水至且蘭乃  
破之此其證也漢武帝欲通西南夷道不通於是  
罷西夷獨置南夷夜郎兩縣此亦非縣治舊志云  
晉分牂柯置夜郎郡是以為晉郡唐太白之謫夜

郎者此也

銅仁府 領縣一長官司五

漢為武陵郡地唐初為辰州地垂拱二年分辰州  
麻陽縣地置錦州盧陽郡始於此置萬安縣為屬  
天寶元年更名常豐宋為思珍二州地元置銅人  
大小江等處蠻夷軍民長官司蓋境之西南有大  
江西北有小江當其合流之處崖高數十仞挺然  
立於中流相傳有漁者沒其底見三足如鼎得銅  
範儒道釋三像故以銅人名崖及置長官司始易  
人為仁永樂十一年始置銅仁府隸貴州

銅仁縣附郭

國初立府之時銅仁長官司如故嗣後長官李永  
虐用其民者老僉言宜改縣設流官以出民于湯  
火萬曆乙未郡人喻政成進士越三年戊戌始改  
為銅仁縣土舍李以謙為主簿云○東山在府城  
東岌葉峭拔為郡巨鎮上有石窩高廣數十武吳  
國倫詩東山突兀雲為巔百雉參差雙練懸入寺  
潭迷上下界倚樓欲盡西南天江光半浸九華玉  
石甲紛披千葉蓮睥睨羣山解飛動誰當坐嘯清  
巒烟○又里許為天乙峯石壁峻嶒每見赤色輒



有灾太守魏君乃于山椒鑿池注水厭之其患遂  
息○城西十里諸葛山形勝突兀俯瞰諸堙上有  
武侯屯營故址○府大江左有廢萬安縣即唐垂  
拱二年立者宋時廢○小江上有家思堂宋湖北  
常平使張惇建蘇子瞻記○府西北十里人同村  
有李留坡墓銅仁副長官李盤者本朝宣德間協  
征鎮箠苗被執賊問曰銅仁耶思南耶蓋賊德銅  
仁欲生之耳公竟不答遂遇害草殯于樹石之間  
久而樹長夾石夷人夜過樹下輒聞空中有甲兵  
聲以為神而祀之于樹下名其地為留石坡焉

省溪長官司在府西一百里元置省溪等處軍民  
長官司隸都雲定雲等處安撫已改省溪填場蠻  
夷長官司隸田州本朝仍名省溪改今屬正長官  
楊姓其副戴姓○司北三里有洞洞口一石肖婦  
人名仙女洞○城西五里有山時五色雲吐遂名  
五雲山○城北七里有泉名雲舍泉歲旱雲禱即  
雨其泉注于宙羅江或曰即省溪水產金

提溪長官司在府西二百四十里元置提溪等處  
軍民長官司洪武初改今司正長官楊秀纂原任  
石阡龍泉司正長官洪武十六年改今職副長官

張坤原任提漢司長官陣亡男應宣陞思南宣慰  
司同知四世孫秉仁授今職皆世襲○治東一里  
為印江又二里為磴山○治西五里為提漢是產  
砂金

大萬山長官司在府南五十里元置大萬山蘇葛  
辦等處軍民長官司洪武初改今司正長官楊政  
華元舊任世襲○大萬山在治南三里司以此名  
新坑山在司北五里產硃砂水銀○司界有勤舍  
長官司故址 我朝正德末年洞中獲本司印一  
顆其文皆八畫不知何義

烏羅長官司在府西二百里元置烏羅龍于等處  
長官司正長官楊金萬曾孫世雄洪武初襲舊職  
副長官冉興祖永樂十一年授今職皆世襲○司  
治西南三里有觀音圍上有三井可容五百人又  
三十里為萬勝磴上有水可容百人俱可以避兵  
○司境山曰迎紅曰雲朶以雲物名曰琴閣曰石  
梁以水石名曰九龍則以支脈名也志謂九龍俗  
名飯甑山高百餘丈下分九支銅仁大江之水出  
焉○司南有江曰也江上納烏羅溪羊溪二水下  
達楚之辰州可以舟筏又有溪名木耳其流曲折

東抵平南寨為九十九渡

平頭著可長官司在府北二百二十里元置平頭  
著可通達等處長官司隸思州宣撫本朝洪武初  
改今名永樂中改隸烏羅府尋改屬今府正長官  
楊姓其副田姓○司界有石榴坡羅所詩云畏途  
盡說石榴坡毒霧衝人似網羅即此○有甘稜泉  
在司界石巖中一泉湧出清濁分流若涇渭相傳  
出萬山之底○司界有仙人題柱舊傳鬻筵道者  
不知何許人宋開寶間郡之瓮蓬寨人楊再從崇  
尚仙學一日有丐者携草蓆一雙詣再從索金五

兩鬢焉再從疑其妄不之信道人擲篋于市化為  
雙鶴冲天而去但見門柱上有詩云新打芒鞋巧  
又牢五金還價未為高楊家不聽渾家語從我蓬  
萊走一遭水洗刀刮其字益顯柱至國初方圮

貴州名勝志卷之四終

貴州及黔東各山邑地

平遠者司長官司立府地七百里十五元會平遠

亦可遠達等處長官司縣地以宜德木野武武

狀元名在書中似與為羅府長官於慶分府以官

物姓以割曰地○國界有石像似羅府縣地

書說石像像每書像一似城羅即此○有石像

義到二地卷地氏陸地字並關絲德關絲德

又案五至聖廟史為高縣地或關絲德地

勢斷於天洲志則象關絲德地或陸海傍

勢斷於天洲志則象關絲德地或陸海傍

貴州名勝志附錄

校字表

卷次	頁次	行數	字數	原	現	改	備註
一	五	七	九	積	積		以牛馬裘 屍而焚之 以牛馬羊 裘而焚之 據貴州通志 蠻獠改
一	六	十七	九	積	積		
一	七	四	十六	醜	醜		
一	七	十二	十四	蘭	蘭		
一	十一	四	十九	霏	菲		
一	十八	十四	六	磬	磬		
一	十九	一	十八	啟	啟		

貴州名勝志

附錄



卷	次	頁	次	行	數	字	數	原	作	現	改	備	註
一	一	二十	十	一	一	清	清						
一	一	二十六	九	十	二	克	充						
一	一	二十七	三	三	二	蓬	蓬						
三	三	二	三	一	一	南	西						
三	三	二	三	一	一	隙	隙						
三	三	二	十五	八	一	隙	隙						
三	三	五	一	十四	一	蝨	蝨						
三	三	五	四	一	一	檄	檄						
三	三	五	五	三	一	檄	檄						
三	三	六	二	十六	一	壺	壺						

卷次	頁次	行數	數字	數原	作現	改備	註
三	十三	十	五	壩	蹈		
三	十四	十	八	壺	壺		
三	十五	十九	十九	攻	改		
三	十七	一	十九	兩	兩		
三	十七	五	五	乘	乘		
三	十七	十七	四	件	件		
三	二十三	十二	七	飲	沃		
四	七	五	二	寨	寨		
四	十	四	五	撤	撤		

